

Fwen Fuengzre Binghraq Sinhgvanh Binghdoeg

Fwen Danq Canghyw Husw

□ Guj Gyah / 古佳

Seizneix miz binghraq,
Ra canghyw bangcoh,
Haujlai vunz mbouj rox,
De sinhoj dwgrengz.

Canghyw dangq daxboh,
Sinhoj vih vunzlai,
Bouxlawz bingh naek lai,
Daiq daeuj yw couh baenz.

Canghyw dangq daxmeh,
Miz de bingh mbouj lau,
Boux iq caeuq bouxlaux,
De bauj raeuz ndang cangq.

Canghyw dangq bohme, h,
Miz de bingh mbouj you,
Miz bingh naek bingh mbaeu,
Raeuz mbouj yungh yousim.

Dwggyaez boux husw,
Binghraq naek cix damz,
Ngoenzngoenz bae hwnjban,
Ndawranz mbouj ndaej goq.

Husw sim caen ndei,
Meiz(miz) vunz heuh couh daeuj,
Boux bingh naek bingh mbaeu,
De souj lumj bohme.

Ndaw yihyen seizneix,
Caen dwg ndei mbouj gvaq,
Husw youq doiqnaj,
Miz maz saeh couh daengz.

Beuj nyouh youh beuj haex,
Husw guh ndaej ndei,
Ngoenz dauqdauq baebae,
Mbouj ae saek coenz haemz.



Cinyenzcunh·Hoenx Binghdoeg

□ Loz Ginhhungz / 罗金宏

Cien mbanj dimz roen, fanh singz gven dou. Daengx guek gwnzlaj, sikhaek caemrwd. Ndwencieng cietheiq, siuhdiuz haujlai, gyangsingz Vujhan, binghdoeg cienzlah, yaek caeuq feihdenj beij yakrwix. Cij geij ngoenz, gyoengq bouxlaux lwgnyez, caez daep goujcau.

Guekcoj yienghneix gyaunde, miz cienfanh bouxak ceiqheiq sang. Gouz bae Vujhan, dwkhoenx binghraq, vunzcaen baedauq, laemzseiz daengx bae; lau deng demluen, cungj hawj doiq biuq. Cij haemh ndeu ndwi, daengx biengz haeujsim, mingzsing goksad. Aeu dingj ndaej! Caez daeuj hoenx binghdoeg, itdingh ndaej hingz!

Gou dwg vunz Nanzningz Si Hinghningz Gih Gunhlunz Cin. Gunhlunz Cin seizgonq heuhguh Giujdangz Gih、Giujdangz Gunghse, bi 1994 cij heuhguh Gunhlunz Cin.

Gou daj bi 1957 doegsaw gauhsiuj bizyez, mbouj ndaej bae gauj cuhcungh, aenvih ranz gou beixnuengx lai, bohme mbouj miz ngaenz soengq bae doegsaw, gou lij iqet couh deng youq ranz guhhong, couh gaen vunz bae guh suiqli, youq Vujdangz Sihvwnzgang guhhong.

Seizhaenx Giujdangz Gunghse youq dangdieg banh aen “gaendoeg” cuhcungh ban Vujdangz ndeu, hawj gij vunz lij iq daeuj guhhong haenx doq doegsaw doq guh senhconz. Suiqli caengz guh caez, youq Yunghningz Yen banh miz aen ban Sawcuengh, moix aen cin cungj miz vunz bae doeg. Giujdangz Cin miz song boux vunz bae, gou hix miz faenh ndaej bae. Ban Sawcuengh ngamq doeg sam ndwen couh sat lo, seizgan dwg bi 1961 ndwen 7 daengz ndwen 10, aenvih gij cingzciik gou ndei, ndaej louz roengzdaeu j doeg Sawcuengh cuh–cungh, youz song aen ban gyoeb baenz aen ban ndeu. Aen ban cuhcungh

Gou Doeg Sawcuengh Daengz Laux

□ Luz Dangzbwnj / 陆塘本

banh daengz bi daihngeih cib nyied, ndaej saenq Sawcuengh bizyez, ban Sawcuengh banh daengz daihsam aen yozgiz, ndaej fat mbaw sawcingq Sawcuengh bizyez ndeu. Gou ndaej–geiq, seizhaenx boux yaucangj dwg Lij Dungzginj, boux lauxsae Sawcuengh dwg Lij Yenzbiz.

Youq 20 sigij 60 nienzdaih seizhaenx, bae yienhsingz banhsaeh、haihoih caeuq doegsaw cungj dwg–rengz lai, aenvih mbouj miz ci dap. Gou bae yienhsingz doeg Sawcuengh, dwg daj Giujdangz Gunghse byaij bae daengz Vujdangz Gunghse (seizneix heuhguh Vujdangz Cin) ninz haemh ndeu, ngoenz daihngeih daj Vujdangz byaij gvaq ndoi gvaq lueg, cij bae daengz dieg yienhsingz heuhguh Buzmyau, caiq bae daengz aen hag–dangz Sawcuengh, gaenq mbwn laep ndaej gwn ngaizhaemh lo.

Aen ban Sawcuengh cuhcungh

doeg daengz bizyez le, ndaw yienh cujciz gunghcozdui roengz lajmbanj bae guh hong sau j mangz, bae lajmbanj son vunz doeg Sawcuengh singmeh, ngoenzhaw daengz gwnz haw son vunzlai doeg Sawcuengh. Hoeng, aen gunghcozdui neix ngamq guhhong mbouj nanz, seizhaenx guekgya raeuz deng Suhlenz bik caiq, youh bungz daengz miz aen yen guhgyaj bau mauh moux naz sou ndaej 13 fanh gaen haeux, haih daengz vunzlai mbouj miz haeux gwn deng dungxiek, yienghneix hong gunghcozdui guh mbouj roengz–bae, doeklaeng couh sanq lo, gij hong son Sawcuengh hix mbouj ndaej guh roengzbae lo.

Seizgan gvaq daengz bi 1989 le, gou cij youq Nanzningz Si Singhhu z Lu ndaej raen Gvangjsih Minzczu z Bau banj Sawcuengh. Haujlai nanz seizgan mbouj ndaej doeg Sawcuengh lo, gou dawz bauqceij Sawcuengh baema

doeg, miz mbanj vunz raen le cungj gangj gou doeg Sawcuengh mbouj miz yungh, gou cungj mbouj leixlangh, ciuqyiengh doq guhhong doq youh doeg youh sij Sawcuengh.

Youh daengz bi 2018 ndwen 12, gou ndaej rox dieg banhgoeng Gvangjsih Minzczu z Bause youq Nanzningz Si Gveicunh Lu, couh heuh lan gou daiq gou bae daengz bause, ndaej raennaj bause boudaeuz caeuq bouxbien, gyoengqde dingqnaeuz gou geijcib bi gonq hag gvaq Sawcuengh, daengz seizneix lij mizsim hag Sawcuengh, cungj haenh gou mbouj dingz, lij heuh gou aeu sij di faenzieng Sawcuengh hawj bause. Daj bi 2019 ndwencieng hwnj, bause lij dinghgeiz geiq bauqceij Sawcuengh hawj gou. Gou youh ndaej doeg bauqceij Sawcuengh lo. Hoeng, bauqceij Sawcuengh seizneix dwg Sawcuengh moq, caeuq gou geijcib bi gonq hag gij Sawcuengh miz di mbouj doxdoengz, gou doeg bauqceij miz di dwgrengz.

Gou doq doeg doq hag, doeg lai le couh hag rox Sawcuengh moq lo. Daj bi 2019 ndwencieng hwnj, gek 7 ngoenz gou sou ndaej bauqceij moq le cungj doeg, hoeng youh miz vunz gangj gou lo, naeuz: “Mwngz lauxgeq doeg gij Sawcuengh neix mbouj miz yungh!” Gou cungj mbouj leixlangh gij vunz neix. Gou mboujdan doeg Sawcuengh, bi 2019 ndwen 7, gou lij bae bauqmingz camgya Sawcuengh gaujsi, doeklaeng gou gauj ndaej cingzciik habgek, ndaej Gvangjsih Bouxcuengh Swcigih Minzczunghvej fat mbaw cingqsaw dem.

Gou hag Sawcuengh baenz seiqvunz, gou miz geij coenz vah ndawsim aeu gangj: Docih gung–canjdangj, raeuz Bouxcuengh cij miz saw raeuz. Bouxcuengh miz Saw–cuengh, vwnzva raeuz ndaej cienz–swnj, Mbanjcuengh raeuz lij ngoenz beij ngoenz gyaunde!

·Sawcuenhraz Lwgnyez·

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

O! Najdah gizgyae, miz moengj ruz hunghung iqiq caemrwg youz bae youz dauq. Lumj mbawfaex caeuq haizdaz fouzfetfet. Lumj ning mbouj ning, yaek daengx mbouj daengx. Caez yawj ndaej raen, cix dog mbouj ndaej. Gwq yawj gwq yawj, mwngz

couh miz gij siengjap yaek gungj hwet gop hwnj saek aen song aen ruz daeuj guhcaemz, hoeng mwngz ciengxlwenx lumh mbouj ndaej.

Miuhsaenzvangz mbouj suenq hung, hoeng caux ndaej lengj, gou ceiq maij gwnz mbaek gij saeurin

gaek miz duzlungz, youq henz lij miz song duz saeceijrin dawz dwk, ndaw bak songde lij hamz miz song naed giuzrin. Moix bi gizneix cungj miz duenh seizgan ndeu ceiq nauhyied, daj liggaeuq ndwencieng coit itcig daengz ndwenngaih co–ngeih, ndaw miuh buiz miz haujlai duzyou, gyoengq vunzmbanj ciengz–seiz swngzgei daeuj neix gyonjcomz guhcaemz, ndaw miuh hoenzieng gvaengxgvax, vunz lai vunz daih, miuh baihnaj dap daizheiq, daj banringzgvaq couh hainduj ciengq heiq, itcig ciengq daengz gyanghwnz bae. (caengz sat)